



# e-bilten

OPĆINA TEŠANJ

www.opcina-tesanj.ba

e-mail: [fuad.sisic@opcina-tesanj.ba](mailto:fuad.sisic@opcina-tesanj.ba)

Petak  
Broj 59

17.10.2011

1. 6. SASE konferencija
2. Nova organizacijska struktura
3. Privatizacija u Tešnju okončana
4. Biznis planovi mladih
5. BLINKER, Kalošević

Ukoliko želite da se prijavite za primanje ovog biltena možete to učiniti tako što ćete poslati e-mail na sljedeću adresu: [fuad.sisic@opcina-tesanj.ba](mailto:fuad.sisic@opcina-tesanj.ba). Molimo vas da ovaj elektronski bilten prosljedite svim zainteresiranim u našoj općini. Ukoliko želite da objavite neke od vaših novosti, iskoristite elektronski bilten općinskog načelnika, koji je brz, efikasan i besplatan način komuniciranja sa javnošću. Sa zadovoljstvom očekujem vaše komentare, sugestije i primjedbe.

**Molim da ne prinate ovaj sadržaj. Za svaki nepotrebno odštampan papir mora se bez potrebe oboriti drvo koje raste!**

## 6. SASE konferencija

### Općina Tešanj u samom vrhu interesovanja

Općina Tešanj se definitivno potvrdila kao drugačija, kako kao sredina u društveno-političkom i ekonomskom smislu tako i u institucionalno-administrativnom. Nakon što su Dani evropskog nasljeđa u BiH održani u Tešnju, a Općina Tešanj dobila zaslužen priznanje – Povelju, kojom se službeno verificirao opći dojam šire javnosti u Bosni i Hercegovini da Tešanj ima bogato kulturno-historijsko nasljeđe o kome se vodi računa i na lokalnom nivou, Općina Tešanj je dobila dva poziva:

prvi, da sudjeluje na 6. međunarodnoj konferenciji SASE u Sarajevo, 11. oktobra i prezentuje model finansiranja uređenja industrijske zone putem emisije općinskih obveznica, i

drugi, da sudjeluje na 6. konferenciji za kvalitet u BiH, u Tuzli od 09. do 11. novembra ove godine i prezentuje sistem kvaliteta Općine Tešanj i Menadžment sistem Općine Tešanj.

Ovo je potvrda da je općinska uprava, odnosno općinska administracija postala pouzdan partner građanima, privrednicima i nevladinom sektoru u razvoju lokalne zajednice. Istovremeno, ovo je i potvrda da se općinskom administracijom rukovodi više menadžerski nego politički, što može biti dobar primjer prakse. Svima je poznato da izborna obećanja uglavnom podstiču očekivanja koja budu iznevjerena. U prošlosti je bilo velikih predizbornih obećanja, parola, koje su mnogima donijele glasove ali građanima i narodu nakon izvjesnog vremena razočarenje. Jedna je stvar političkih stranaka koje ulaze u bezpoštednu izbornu utrku, i možda čak u zanosu borbe olahko obećavaju. Druga je stvar na pojedinačnoj ravni, na ravni kandidata koji preuzimaju na sebe zadatke za koje nemaju kompetencija. To je još i veće neodgovorno ponašanje. Ono je čak i okrutno, jer ljudi očekuju nešto na čemu niko ne radi ništa. Javne institucije, javne administracije, moraju steći svu potrebnu kompetentnost da bi preuzele odgovornost za svoje uticaje. Pored političkih prepreka globalno, pravo i dužnost djelovanja institucija na svim nivoima su ograničeni kompetentnošću. Za instituciju je bolje da ne preuzima zadatke nego da se ne uklopi u zadati, ili bolje reći, očekivani vrijednosni sistem.

Mogu kazati iz iskustva općinske administracije u Tešnju da se znanja i vještine prilično lahko i brzo stiču. Ali ličnost se ne mijenja lahko. Malo je vjerovatno da će bilo ko biti uspješan u onome čemu nije posvećen i u onome što ne cijeni. Stoga rukovodstvo mora u najmanju ruku znati šta je ono što institucija na čijem je čelu radi nekompetentno. Za takvu ocjenu ništa ne znače "politička" stajališta i emocije, odobravanje ili neodobravanje dijela javnosti. Nužno je doći do mjerljivih performansi, koje se kroz vrijeme, uspostavljenim mehanizmima mogu poboljšavati.



Resursni Ekološki Centar Zenica (REC ZDK Zenica) koji svake godine dodjeljuje priznanje najuređenijoj općini na području ZeDo kantona, ove godine to priznanje je dodijeljeno općini Tešanj. Istovremeno, priznanje su dobili i EKO-MLADI, nevladino udruženje građana kao najaktivnija članica RECa. EKO-MLADI su već dobili priznanje Općine Tešanj za poseban doprinos u realizaciji projekata za dostizanje vizije: Tešanj – sredina ekološke svijesti, čistoće i reda i kao posebno važan i pouzdan partner lokalne uprave, kao i naš sugrađanin Šefket Turalić.

Uspješno je održana i V konferencija bibliotekara na temu *Uloga biblioteke u interkulturalnom dijalogu*. Opća biblioteka Tešanj je po peti puta bila uspješan domaćin, a gosti nisu krili svoje pozitivne impresije sa lokalnim ambijentom i samom organizacijom konferencije.

Studija i idejno rješenje prikupljanja otpadnih voda sa uređajima za prečušćavanje je okončano, i u toku je javni poziv za izradu idejnog projekta. Ovaj posebno važan projekat za sve građane općine Tešanj ulazi u završnu projektnu fazu. Pred nama je izrada idejnog projekta a onda izvedbenog projekta i rješavanje imovinsko-pravnih odnosa za izgradnju primarnog kolektora kanalizacije. Dinamički plan još uvijek nije ugrožen, tako da kraj 2012. ili eventualno početak 2013. godine može predstavljati početak izvedbenih radova na ovom najvećem projektu. Naime, projektovana vrijednost u idejnom rješenju je nešto iznad 75 miliona KM. Naravno, dugo godina će se ovaj sistem izgrađivati i iz različitih izvora finansiranja, ali će sasvim sigurno i građani morati dati svoje učešće. Čista okolina je bila besplatna dok nije došlo do tehnološkog razvoja. Bilo je živjeti teže, ali nije bilo skupo. Sada se može živjeti mnogo lakše, ali sve mnogo košta, pogotovo vratiti čistu vodu iz domaćinstava nazad u prirodu. Ali drugog puta nema, stoga je dobro da čim prije prijedemo put koji je neminovno prijeći.

I uređenje 1. faze industrijske zone „Glinište“ je spremno. Odabran je izvođač radova, ali zakon o javnoj nabavci omogućava vođenje žalbenih postupaka koji traju i kada za takvo nešto nema nikakvih razloga. To usporava proces ali ga neće zaustaviti, baš kao što i zakonska rješenja o eksproprijaciji ne dopuštaju ni u javnom interesu ulazak u privatnu parcelu ako nema sporazuma sa vlasnikom, sve do pravosnažnog sudskog rješenja. Bilo bi mnogo bolje da rješenja u upravnom postupku budu dovoljna za ulazak u parcele radi izvođenja radova, a sudska rješenja za izmirenje naknade prema vlasnicima. Ovako se zaustavljaju aktivnosti bez stvarnog razloga. Ali treba raditi u okviru postojećih rješenja dok se ne donesu nova, i tako i radimo.

---


## Nova organizacijska struktura

---

### Jačanje unutrašnje strukture

Općina Tešanj je ponovo izmjenila organizacijsku strukturu, drugi puta u posljednje tri godine. Razvoj menadžment sistema općinske administracije i prilagođavanje promjenama zahtjeva promjene u organizacijskoj strukturi. Posljednjom organizacijom je smanjena još jedna općinska služba, tako da od 01.10.2011. godine Općina Tešanj ima pet općinskih službi, u odnosu na sedam koliko je bilo 2009. godine. Sada su to sljedeće službe:





1. Služba za društvene djelatnosti, komunalne poslove i ekologiju; pomoćnik Suad Huskić
2. Služba za finansije, privredu i inspekcije; pomoćnik: Hamzalija Hojkurić
3. Služba za katastar, imovinsko-pravne poslove i urbanizam; pomoćnik: Nadir Medarić
4. Služba za boračko-invalidsku zaštitu; pomoćnik: Nerminka Handžić
5. Služba civilne zaštite i vatrogasna jedinica; pomoćnik: Mensur Saletović

Uvedena je profesionalna pozicija Predstavnik rukovodstva za kvalitet (PRK), g-din Ferid Mustafić i na taj način osnažen pristup razvoju sistema kvaliteta općinske uprave. Istovremeno je formirano 15 odjela unutar pet općinskih službi. Ova organizacija treba da omogući i razvoj srednjeg menadžmenta koji nije postojao u unutrašnjoj strukturi. Vođe odjela neće biti profesionalna radna mjesta nego dio rukovodne strukture iz postojećeg rasporeda poslova sa nekom dodatnom stimulacijom za obavljanje rukovodnih poslova na nivou odjela. Time bi se utemeljila nova struktura, koja će neovisno o tome ko bude na poziciji općinskog načelnika, imati priliku da nastavi proces stalnih poboljšanja.

Istovremeno je nastavljena edukacija uposlenih, osposobljavanje novim znanjima i vještinama kako bi administracija bila sposobna uraditi više sa manje angažovanih resursa. U tom smislu je angažovana REZ agencija koja je kroz četverodnevni seminar u prostorijama Općine Tešanj provela edukaciju za 14 uposlenih na temu Upravljanje projektnim ciklusom. Znanje iz ove oblasti je provjereno kroz seminar na izradi projekta realizacije regulacionog plana „Glinište“. Općina Tešanj je prva općina koja je pokrenula i održala ovakvu edukaciju.

## Privatizacija u Tešnju okončana

### *Sloga i Autoprijevoz prodani u stečaju*

Tema neuspješnih privatizacija godinama je prisutna kao dnevna vijest, a razočarenja i protesti uposlenih su izraz nemoći da se bilo šta promijeni. Prije nekoliko godina i radnici firme „Sloga“ su protestovali pred zgradom Općine jer novi vlasnik nije bio ispunio njihova očekivanja. Općina Tešanj je 2009. godine, kao jedan od povjerilaca, pokrenula zahtjev za stečaj firme **Sloga** jer je bilo očigledno da novi vlasnik ne samo da nije održao nastavak biznisa, nego nije pokazivao nikakvu brigu ni za preostalim imovinom. Uskoro je stiglo sudsko rješenje o pokretanju stečaja, i proces je započeo. Nakon više pokušaja prodaje imovine kroz stečajni postupak, 23. septembra ove godine je firma MADI, Tešanj kupila imovinu: zgrada, fabrički krug, upravna zgrada i dvorište, sve ukupno površine oko 32 dunuma za iznos od 1.955.474,00 KM dok je firma KOTEKS, Tešanj kupila isti dan parcelu zemljišta od sedam dunuma u iznosu od 130.000,00 KM.

Iste sedmice (20.09.2011), nakon više pokušaja, prodana je i imovine bivše firme **Autoprijevoz**, Tešanj a kupac je poznata sarajevska prijevoznika kompanija CENTRTRANS EUROLINES, koja je kupila zgradu, zemljište, biletarnicu i mehaničarsku radionicu po cijeni od 437.800,00 KM.



Prošle godine se to dogodilo sa imovinom firme Ukus. Vidjeli smo promjene koje su nastale prodajom imovine firme Ukus. Danas na ovoj lokaciji imamo više manjih proizvodnih djelatnosti koje uspješno rade, ali i razvijenu ugostiteljsku djelatnost u potpuno novom ambijentu. Na proljeće se očekuju nova ulaganja koja će na ovoj lokaciji omogućiti prodajni centar i smještajne kapacitete koji nedostaju. Vlasnik Namik Širbegović je napravio od napuštene lokacije novi ambijent i nova radna mjesta. To očekujemo i od lokacija sada bivše Sloge, i Autoprijevoza, očekujemo nove prilike i mogućnosti za radna mjesta.

Tranzicijski procesi se ne smiju zaustavljati niti usporavati, njih treba ubrzati što je više moguće. Ovakvi procesi su uvijek bolni za neke kategorije, u našem slučaju za uposlene u Ukusu, Slogi, Autoprijevozu. Oni su žrtve tranzicijskog procesa, i teško im se može pomoći. Jedini izvor su sredstva dobivena prodajom imovine, koja nakon što se izmire poreska dugovanja, stoje na raspolaganju da se izmire obaveze prema radnicima. Sve drugo su uzaludna očekivanja. To jeste za njih surova realnost ali je realnost. Ali život zajednice mora ići dalje, i nove prilike su veće ako taj tranzicijski proces teče što kraće. Stoga u slučaju općine Tešanj, u poređenju sa drugima, privatizacija nije ostavila velike traume i propale lokacije. Jedino Zvečaj, odnosno hotel u samom gradu, iako je došao u posjed privatnog kapitala ni nakon šest godina nije promijenio sliku. Nadati se da će u ukupnom ambijentu promjena i vlasnik ovog objekta krenuti sa investicijom.

### **Biznis planovi mladih**

#### *Prvi poziv uspješno okončan*

Općina Tešanj je pokrenula projekat podrške mladim ljudima koji su spremni sami krenuti u borbu na tržištu. Nakon raspisanog javnog poziva za prijavu biznis planova pristiglo je 12 prijava. Nakon ocjene komisije sačinjene od privrednika na čelu sa Smailom Ramović, direktorom kompanije MHBA, formiran je prijedlog ponude onima čiji su planovi ocijenjeni uspješnim. Pripremljen je prijedlog ugovora koji će Općina Tešanj potpisati sa svakim od podnosioca biznis planova tokom 42. sedmice a kojima Općina Tešanj osigurava finansijsku podršku za registraciju djelatnosti (100% finansira Općina), te sufinansiranju zakupa poslovnog prostora i obaveza na platu.

### **Blinker, Kalošević**

#### *Izražena briga za okolinom*

Sportsko-ribolovno društvo Blinker, Kalošević okuplja veliki broj zaljubljenika ovog sporta ali i pokazuje izuzetnu brigu za okolinom. Blinker, Kalošević organizuje veliki broj događaja na jezeru u Mrkotiću o kome vodi posebnu brigu, ali provodi i aktivnosti na čišćenju obala rijeke Usore već dugo vremena. Zapuštene površine se rekultiviraju i dobivaju sasvim novi izgled, prestaju biti lokacije za bacanje smeća u prolazu i postaju biti eko-oaze. Svaka čast za SRD „Blinker“, Kalošević! Bez sumnje, dobar primjer prakse društvene odgovornosti.

Općinski načelnik  
Fuad Šišić

